





Jetzt – bevor ich Euchi Levite lise –  
wott i z'erscht Euchi Welpa begrüesse.  
Aber Eues Durchschnittalter isch es latänts Problem.  
Drum dank ich „Groswelpa“ tönti grad eso schön.

---

## **Intro II**

So Ihr Herre Pilote – jetzt isch Rue da hinde!  
Denn jetzt bini fertig mit de liebe Chinde.  
Jetzt gilt's ernscht, jetzt will ich mol sichte  
was es do so über Euch git z'brichte!  
Jetzt wird emänd de Abig gar schröcklich  
und für d'Halungge under Euch entsetzlich!

A de SHV-Sportfiir hani d'Ohre gschpitzt nur  
aber vom Deltaclub Stans wiit und breit e kei Spur.  
Nur de Name Sägesser isch mir bekannt  
aber g'schtartet isch dä für's Zugerland!  
Dä Chlais schüttlet de Chopf und fraget keck:  
Was isch denn nur los mit Euch müede Seck?  
Ihr händ Schpitze-Pilote. Was bruched Ihr meh?  
Da chönd Ihr jetzt nid au no Corona d'Schuld geh!  
Das arme Virus – das säg i ganz sacht -  
wird suscht scho für alles verantwortlich g'macht!



Losed mal wie's chrooset, rumplet und tätscht  
wenn de DCS Chugle noime hindere prätscht.  
Disco-Bowling händ Ihr g'macht wie g'schtört  
vo de luute Musig hätt mer nüt me g'hört.  
De Locher und de Güggele Ludi  
händ zäme kniffe ihri Fudi:  
Händ sich de Sieg nid welle la näh –  
Ranglischte hetts darum e keini gäh.

### **Kasi Steiger**

D'Bähnler am Stanserhorn sind immer parat  
und hälfed Euch immer wo's nume gaht.  
Dä Chlaus hätt's beobachtet mit viel Gschick  
und findt, Ihr händ es huereverdammts Glück!  
Doch wenn eine grad im Chopf het anderi Sache  
muesch mit ihm nid sofort en Hoselupf mache!  
Oh Kasimir Steiger Du hitzige Sack  
benimm di doch ned wien'es Lumpepack!

### **Fredi Bircher**

Du bisch uf em Stanserhorn vom Morge bis z'Abe  
und schtürchlich mit Tourischte det d'Rampe abe.  
S'Horn-Reschtrant isch Dini erschti Adrässe,  
wenns drum got ums Sandwich frässe.  
Im April da hesch Dich nid scheniert  
und de Delta-Swiss-Cup dominiert.  
Us lahme Hüener chasch Du Adler züchte –  
ihr gsänd, dä Chlais cha nur erfreulichs brichte.  
Viel junge Clubnachwuchs bringsch Du is Land.  
Dä Chlais sait „grossartig!“ und schüttlet Dir d'Hand.



## **Rogu**

En gschtandne Deltischt isch er und kein Depp,  
heisse tued er eigetlech Rogger Sepp.

Als Pilot da bisch Du immer da  
so wahr ich tue davore stah!

Flügsch über Fälder, Wiese, Wald und Schnee -  
das chamer im WhatsApp-Status g'seh.

Nur leider machsch Du falschi Pflänz,  
flügsch ume wie nen Grittibänz!

## **Ruedi Imholz**

Wenn's schtöhne ghörsch und mängisch Wüete  
tued de Ruedi über de Finanze brüete.

Z'erscht git's e Websiite womer sich nid cha leische  
denn muesch Mitgliederbiträg mahne – und zwar di meische.

Finanzminischer z'sii das esch en Gruus  
drum gheied Dir bald au die letschte Haar uus.

Wenn's mol so wiit esch bim Finanze länke  
wird Dir de Chlais gern en Perügge schänke.

Doch underdesse – Schmutzli, schtah nid eifach do –  
sellsch Du z'erscht mal es tüürs Chlaussäckli übercho.



## **Werni Vogel**

Wenn's en Konschtante git i dem Club dem alte  
denn, dass ich über Dich immer dörf Lobrede halte.  
Ich pass s'ganz Johr uf öbi nid mal öppis finde zum motze  
aber Du chasch locker jedem vo dene Versüech trotze.  
So hesch Du das Johr a Pfingschte mal wider brilliert  
und uf de Älggi-Alp en tolle Event organisiert.  
Alli Teilnehmer – das sägi da –  
händ z'fride lüchtendi Auge gha.  
Öb en Aalass, Pfläg Clubbus oder anderi Sache:  
De Werni tued's eifach ohni z'schnorre grad mache.  
Du bisch Dreh- und Angelpunkt vom Club mit viel Gschick:  
Ich find, Eue Präsi de hed es Rieseglück!

## **Daniel Oberhänsli**

Es Mitglied i däm Club bisch Du noni lang,  
und scho wird's im Chlais bim zueluege bang!  
Schtatt flüüge hesch s'Gfühl gha muesch öppis anders  
mache:  
Go ruedere in Norde und sennig blödi Sache.  
No nie hani g'seh gföhrlichere Sport no krasser  
g'freut het sich en norwegische Chnocheschlosser!  
Ich hoffe dä Spuk isch jetzt aber verbii  
und Du chasch bald wider a de Basis sii!  
En Chlaussack für Dich de Schmutzli no hett  
s'Calcium i de Nüss stärkt dis lädierte Skelett!



## **Guido Mathis**

Das Fүүr dazue isch wohlig und warm  
mis Koschtüm dampft scho am rächte Arm.  
Im Arsch vom Schmutzli tued s'Wasser choche  
us mim Bart do hätts vori au scho g'roche.  
Trotzdem isch's heimelig – das chan i scho säge.  
Und das, will Du das Fүүr tuesch hege und pfläge.  
Liebe Guido drum sait Dir de Chlaus:  
Du verdiensch min grosse Applaus.  
Das nümme flüege chasch tuen ich vo Härze beduere  
und hoff dass Du am Bode nid muesch versuere.  
Ich wünsch das Du nid im Stich lasch die Type die alte  
sondern das Du im Deltaclub Stans bliibsch erhalte.

## **Markus Limacher**

Er isch für de Club au en schtille Schaffer  
für Eues Wohl – dä Märk Limacher.  
Dis arme Skelett hät scho vili Bülle  
vor allem vom lande, hani g'höre hülle.  
Nid nur Flüeger-Landige händ di lädiert  
sondern s'hätt Dich au abem Velo schpediert.  
Din Materialverschleiss isch senstationell –  
hüb doch e chli Sorg zu Dim Chnochegschtell!  
Kei Angscht, für Dis Würke gits keis Küssli –  
aber en Sack mit schpanische Nüssli.



## **Christian Furler**

Nach Durschtschrecki mit Flügerkrise  
bisch zru gg cho mit ere wilde Frise.  
Au wenn mir dewäge de Bart obsi schtahd  
bisch doch ganz en treue Kamerad:  
Wenn mal abgsoffe bisch wartisch am Landeplatz unde  
uf din Flügerkumpel – wens mus si au zwei Schtunde!  
Au Dini Gaschtfründschaft isch immer 1aa –  
Drum säg ich liebe Dank däm wilde Maa.

## **Manfred Haas**

D' Ärde het bebt, s'het donneret und kracht  
wo de Manfred het sini Hanglandig gmacht!  
Es het en furchtbar iegschpitzt wie no keine zuvor,  
kaputt gange sind Chnoche, nid nur Kevlar-Rohr.  
Und jetzt – nachere johrelanger Genesigs-Ziit  
het er beschlosse das flüge nümme dinne liit.  
Dä Chlais weiss vieles – drum weiss er au das.  
Dä Manfred het mir's gseit – es isch kei Gschpass!  
I dem Club het er toll g'waltet als Presidänt  
au im CrossCountryCup länger als nur en Momänt.  
Ich wünsche ihm Glück i sim wiitere Läbe  
au wenn er nüm wandlet uf luftige Wäge.



## **Extro**

So, jetzt isch fertig mit dem umeliire.

Ich mach mich vom Acher das Ihr nochli chönd fiire.

Dä Chlais sait Euch allne mitenand:

Ihr sind en ganz en tolle Verband!

Euche Presi, dä chönnti stolz uf Euch sii,  
aber hüt Zabig isch er leider nid derbii.

Wahrschinlech tued er grad Unsinn uf'd Website scribe  
und demit die letschte tolerante Läser vertribe.

De Chlais seit tschou zäme, muess sin Heiwäg ufsueche  
und hofft, er findt underwägs no en Schnaps und echli  
Chueche.

Ich wünsch Euch knackigi Thermik über jedem Hügel  
und immer meh als nume gnueg Luft underem Flügel!